

8. oktober 2013

UKA 2013/67  
Hans Enoksen

**Akiitsunut aningaasaliinissamullu pilersaarutit naapertorlugit Tasiilami mittarfiliornissamut periarfissaqarsinnaaneranut atatillugu misissueqqaarnerit tullianillu businesscare aallarteqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissueqqaarnerit naammassineqareersimassapput ukiumi aningaasaliiffiusumi 2015-mi timmisartunut suluusalinnut mittarfiliornepup pilersaarusionera aallartinneqarsinnaaqqullugu.**

(Inatsisartunut ilaasortaq Palle Christiansen, Demokraatit)

Inatsisartunut ilaasortaq Palle Christiansen siunnersuuteqarpoq aalajangiiffigisassamik Tasiilami mittarfiliortoqarnissaa pillugu, tamannalu Siumumit naatsumik oqaaseqarfigissavarput.

Taasilaq nunatsinni illoqarfiit takornariaqarnikkut inissimalluartut ilagaat, pingaartumik aamma Kulusuk takornariaqarnikkut ornigarluarneqartarput, aningaasarsionikkullu pingaaruteqarluinnarpoq sapinngisamik amerlanerpaat takonarissat nunatsinnukarnissaanut periarfissanik pitsanngorsaajuarnissaq.

Taamaattumik nunatta aningaasaqarnikkut imminut napatinnerulernissaanut aamma mittarfiit sumi inissisimanerat pingaaruteqartorujussuuvoq sapinngisamillu ingerlatsineq akikinnerpaaq ujartariaqarluni.

Tassami angallannerup qanoq akeqarnerannut aammalu kiffartuussinermi isumaqatigiisuteqartarnermut aallaviusorujussuupput, kiffartuunneqarnermi minnerusuuppat taava aningaasat allanut atugassagut amerlanerussussagaluartut tamatta takusinnaagatsigu.

Aningaasarsionerput nukittunerulissappat mittarfiit aamma illoqarfinni orninneqartartuniip-pata tamatsinnut pitsaanerugassagaluarpoq, neriunniartalu siunissami tamanna angujartuassagipput tassami aningaasanik kuuginnartunik soqannginnatta akilersinnaasagut sipporlugit ingerlasinnaannginnata.

Siunissami Tasiilaq mittarfeqalissappat aamma tapersersornarluarpoq ilaasummi amerlanerpaat tunumi aamma Tasiilamukartuusarput, taamattumik pissusissamisoortutut Siumumit isigaarput siunissami Tasiilami mittarfeqalernissaa.

Naalakkersuisut nuna tamakkerlugu mittarfeqarnerup pilersaarusionerfigineqarnissaanut aallartitsisimanerat Siumumit iluarisimaarparput tassami ilaatigut misissuilluarnikkut aamma aningaasanik sipaaruteqarsinnaanerit pisariaqanngitsumillu aningaasartuutaasinnaasut pingitsoorneqarsinnaaniassammata.

Taamaalilluni pilersaarut 2014-mi ukiup affaani siullermi suliarineqareersimassasoq Naalakkersuisut neriorsutaat qilanaaralugu utaqqissavarput Tasiilami mittarfissamut misissueqarnissat pilersaarutit aallartinneqarsinnaanngussammata. Taamaakkaluortoq misissuil-

luarnissat aallartinneqartussat utaqqineqartussaammata siunnersuutip itigartinneqarnissaa Siumumi oqaatigaarput.